

**UJEDINENE
NACIJE**



Međunarodni rezidualni mehanizam
za krivične sudove

Predmet br. MICT-13-56-ES

Datum: 1. decembar 2025.

Original: engleski

PREDSJEDNICA MEHANIZMA

Rješava: sudija Graciela Gatti Santana, predsjednica
Sekretar: g. Abubacarr M. Tambaou
Odluka od: 1. decembra 2025.

TUŽILAC

protiv

RATKA MLADIĆA

JAVNO

**ODLUKA PO ZAHTJEVU RATKA MLADIĆA ZA PONOVO
RAZMATRANJE ODLUKE PO MOLBI ZA PUŠTANJE NA
SLOBODU**

Zastupnici g. Ratka Mladića:

g. Dragan Ivetić
g. Branko Lukić

JA, GRACIELA GATTI SANTANA, predsjednica Međunarodnog rezidualnog mehanizma za krivične sudove (dalje u tekstu: predsjednica, odnosno Mehanizam);

PODSJEĆAJUĆI da je dana 8. juna 2021. Žalbeno vijeće Mehanizma (dalje u tekstu: Žalbeno vijeće) potvrdilo: (i) osuđujuće presude g. Ratka Mladića (dalje u tekstu: Mladić) za genocid, progon, istrebljenje, ubistvo, deportaciju i nehumana djela (prisilno premještanje) kao zločine protiv čovječnosti i za ubistvo, terorisanje, protivpravne napade na civile i uzimanje talaca kao kršenja zakona i običaja ratovanja; i (ii) njegovu kaznu doživotnog zatvora;¹

PODSJEĆAJUĆI da je nakon pravosnažne presude Mladić ostao u Pritvorskoj jedinici Ujedinjenih nacija u Haagu, gdje čeka određivanje države u koju će biti prebačen na izdržavanje ostatka kazne;

PODSJEĆAJUĆI da sam 11. novembra 2025. odbila molbu koju je Mladić podnio, kojom traži privremeno puštanje na slobodu na period od sedam dana iz razloga saosjećajnosti kako bi mu se omogućilo da ode na grob i prisustvuje komemoraciji za nedavno preminulog bliskog člana porodice;²

RJEŠAVAJUĆI po zahtjevu koji je Mladić podnio 20. novembra 2025., kojim traži da ponovno razmotrim odluku od 11. novembra 2025. i da odobrim Molbu;³

IMAJUĆI U VIDU Mladićeve argumente da je odluka od 11. novembra 2025. očito nepravедna i da sadrži jasne greške u rezonovanju koje predstavljaju nepravdu iz razloga: (i) što su rizici koji se navode u Odluci od 11. novembra 2025. doveli do pogrešnog zaključka o činjenicama budući da su Republika Srbija (dalje u tekstu: Srbija) i Republika Srpska dostavile garancije koje u vrijeme donošenja odluke nisu bile dostupne;⁴ i (ii) što su u Odluci od 11. novembra 2025. zanemareni ukupni dokazi koji su mi predočeni, koji uključuju izvještaje o Mladićevoj ograničenoj samostalnoj pokretljivosti, što utiče na rizik od bjekstva;⁵

¹ *Tužilac protiv Ratka Mladića*, predmet br. MICT-13-56-A, Presuda, 8. juni 2021. (javno redigovano), par. 592. V. *Tužilac protiv Ratka Mladića*, predmet br. IT-09-92-T, Presuda, 22. novembar 2017. (javno s povjerljivim dodatkom), par. 5214-5215.

² Odluka po molbi za puštanje na slobodu Ratka Mladića, 11. novembar 2025. (dalje u tekstu: Odluka od 11. novembra 2025.). V. Hitna molba odbrane za privremeno puštanje na slobodu iz razloga saosjećajnosti na određeni period radi prisustva komemoraciji od 40 dana, 5. novembar 2025. (povjerljivo i *ex parte*) (dalje u tekstu: Molba).

³ Zahtjev za ponovno razmatranje odluke predsjednice od 11. novembra 2025., "Odluka po molbi za puštanje na slobodu Ratka Mladića" (povjerljivo i *ex parte*) (dalje u tekstu: Zahtjev), par. 2, 20.

⁴ Zahtjev, par. 2, 11-12.

⁵ Zahtjev, par. 13-16, 20.

PODSJEĆAJUĆI da strana u postupku koja traži ponovno razmatranje neke odluke mora pokazati postojanje očigledne greške u rezonovanju u pobijanoj odluci ili postojanje posebnih okolnosti koje opravdavaju ponovno razmatranje kako bi se izbjegla nepravda;⁶

UZIMAJUĆI U OBZIR da sam u Odluci od 11. novembra 2025. napomenula da je Mladić tražio i očekivao da će dobiti garancije od vlasti Srbije i Republike Srpske i da nisam smatrala da je potrebno čekati takve garancije jer ne bi uticale na moju ocjenu Molbe;⁷

UZIMAJUĆI U OBZIR da garancije države nisu presudne za donošenje odluka u vezi s privremenim puštanjem na slobodu;⁸

UZIMAJUĆI U OBZIR da su u Odluci od 11. novembra 2025. uzeti u obzir Mladićevi argumenti da njegovo fizičko stanje pokazuje da kod njega ne postoji rizik od bjekstva;⁹

UZIMAJUĆI U OBZIR da se, u mjeri u kojoj su poodmakle godine i fizičko stanje relevantni prilikom razmatranja rizika da se osoba koja traži privremeno puštanje na slobodu možda neće vratiti u pritvor Mehanizma, ocjena o tome da li je takvo puštanje na slobodu opravdano donosi od slučaja do slučaja;¹⁰

UZIMAJUĆI U OBZIR da su, suprotno Mladićevim argumentima,¹¹ njegov status bjegunca prije nego što je uhapšen i odluke Pretresnog vijeća Međunarodnog krivičnog suda za bivšu Jugoslaviju i Žalbenog vijeća da mu ne odobre privremeno puštanje na slobodu, od kojih je posljednja donijeta 2019., bili relevantni u mojoj ocjeni Zahtjeva, u skladu s ustaljenom sudskom praksom;¹²

KONSTATUJUĆI da, u svjetlu gore navedenog, Mladić nije pokazao da je opravdano preispitivanje odluke od 11. novembra 2025.;

⁶ V. npr. *Tužilac protiv Radovana Karadžića*, predmet br. MICT-13-55, Odluka po zahtjevu Radovana Karadžića za izuzeće i ponovno razmatranje odbacivanja najave žalbe na kaznu, 14. juli 2020., str. 3; *Tužilac protiv Alfreda Museme*, predmet br. MICT-12-15-ES.1, Odluka po Zahtjevu za ponovno razmatranje odluke kojom se odbija prijevremeno puštanje na slobodu, 10. januar 2020., str. 1.

⁷ Odluka od 11. novembra 2025., fusnota 4. S tim u vezi primjećujem da bih očekivala od Mladića da također traži i podnese garancije od vlade Bosne i Hercegovine. V. *Tužilac protiv Radovana Karadžića*, predmet br. MICT-13-55-A, Odluka po zahtjevima za privremeno puštanje na slobodu i za puštanje na slobodu u kraćem trajanju radi prisustva komemoraciji, 31. maj 2016. (dalje u tekstu: Odluka u predmetu *Karadžić*), par. 9.

⁸ *Tužilac protiv Ratka Mladića*, predmet br. MICT-13-56-A, Odluka po zahtjevu za privremeno puštanje na slobodu, 19. mart 2019. (povjerljivo) (dalje u tekstu: Odluka od 19. marta 2019.), str. 3; *Tužilac protiv Ratka Mladića*, predmet br. IT-09-92-AR65.1, Javna redigovana verzija "Odluke po interlokutornoj žalbi na odluku po hitnom zahtjevu za privremeno puštanje na slobodu" od 27. juna 2017., 30. juni 2017., par. 16; *Tužilac protiv Ante Gotovine i drugih*, predmet br. IT-06-90-AR108bis.2, Odluka po Zahtjevu Hrvatske za preispitivanje odluke Raspravnog vijeća o privremenom puštanju na slobodu, 17. januar 2008., par. 12.

⁹ Odluka od 11. novembra 2025., str. 1.

¹⁰ V. Odluka od 19. marta 2019., str. 3; Odluka u predmetu *Karadžić*, par. 7.

¹¹ V. Zahtjev, par. 14.

¹² Odluka od 19. marta 2019., str. 3; Odluka u predmetu *Karadžić*, par. 10. V. Odluka od 11. novembra 2025., str. 2.

IZ GORE NAVEDENIH RAZLOGA,

OVIM ODBIJAM Zahtjev.

Sastavljeno na engleskom i francuskom jeziku, pri čemu je mjerodavna verzija na engleskom.

Dana 1. decembra 2025.,
u Haagu,
Nizozemska.

/potpis na originalu
sudija Graciela Gatti Santana
predsjednica

[pečat Mehanizma]